

Kelantangan Anwar terhadap Palestin ciri penting hubungan antarabangsa Malaysia

Astro AWANI

Oktober 25, 2023 12:23 MYT

KUALA LUMPUR: Kelantangan Malaysia menggesa negara lain agar menyokong Palestin dan menamatkan kekejaman Israel ialah ciri utama hubungan antarabangsa negara di bawah pimpinan Datuk Seri Anwar Ibrahim.

Beberapa penganalisis memuji keberanian Anwar bersuara dan membawa pandangan itu ke pentas dunia dalam menyatakan solidariti dengan rakyat Palestin.

Anwar berani menyuarakan pendapat dan konsisten dalam menyokong perjuangan Palestin. Pada 22 Sept, menerusi kenyataan negara sulungnya pada Perhimpunan Agung Pertubuhan Bangsa-Bangsa Bersatu di New York, Perdana Menteri telah mengetengahkan hipokrasi ketara Barat dalam menangani isu Palestin.

Beliau menyeru usaha pelbagai hala bersepodu yang diterajui Pertubuhan Bangsa-Bangsa Bersatu (PBB) untuk menyelesaikan semua konflik dan krisis kemanusiaan di dunia.

Semasa Sidang Kemuncak ASEAN-Majlis Kerjasama Teluk (GCC) di Riyadh baru-baru ini, Anwar menggunakan peluang yang ada untuk membangkitkan isu Palestin kepada seberapa ramai pemimpin dan negara lain, menggesa masyarakat antarabangsa untuk menamatkan pencerobohan berterusan terhadap Palestin.

Konflik Palestin-Israel menjadi tumpuan dan merupakan topik utama perbincangan antara Anwar dengan Putera Mahkota Mohammed bin Salman yang juga Perdana Menteri Arab Saudi semasa pertemuan empat mata selepas sidang kemuncak itu.

Anwar turut membincangkan konflik di Semenanjung Gaza yang berterusan dengan Setiausaha Agung Liga Muslim Sedunia Dr Muhammad Abdulkarim Al-Issa di Riyadh, Persiden Turkiye Recep Tayyip Erdogan di Istanbul dan Presiden Mesir Abdel Fattah El-Sisi di Kaherah semasa lawatan kerja beliau ke negara berkanaan baru-baru ini.

Penasihat Utama Pusat Penyelidikan Pasifik Malaysia Dr Oh Ei Sun berkata Anwar berhasrat untuk diiktiraf sebagai penyokong dunia Islam di barisan hadapan dalam memperjuangkan isu Palestin.

"Oleh itu, tidak hairanlah Anwar secara proaktif membawa pendirian pro-Palestin di peringkat domestik dan antarabangsa. Di negara ini, nasib Palestin mungkin antara beberapa isu yang boleh menyatukan parti didominasi Melayu, justeru Anwar perlu cekap meletakkan dirinya di barisan hadapan dalam masalah ini," katanya kepada Bernama.

Ketika ditanya sama ada Malaysia akan menjangkakan kesan dari negara Barat kerana memperjuangkan nasib Palestin, Felo Kanan di Institut Hal Ehwal Antarabangsa Singapura itu berkata kebanyakannya negara Barat memahami keperluan domestik untuk kerajaan didominasi orang Islam atau pemimpinnya untuk menonjolkan pendirian yang lebih pro-Palestin.

Oleh itu, katanya, hubungan diplomatik antara Malaysia dengan negara berkanaan mungkin tidak terjejas dengan teruk.

Timbalan Pengarah Eksekutif Institut Asia-Eropah, Universiti Malaya (UM) Prof Madya Dr Roy Anthony Rogers pula berkata Anwar menjadi penyokong tegar perjuangan Palestin sejak awal penglibatannya dalam Angkatan Belia Islam Malaysia (ABIM) dan sangat konsisten dalam pendiriannya.

Beliau berkata isu itu merupakan krisis global dan Malaysia perlu menggunakan platform antarabangsa dan serantau seperti ASEAN, Pertubuhan Kerjasama Islam (OIC) dan PBB untuk meneruskan perjuangan berkanaan.

"Dasar luar Malaysia terhadap Palestin amat konsisten. Sejak 1960-an, Malaysia begitu menyokong perjuangan penduduk Palestin.

"Malaysia sedang melaksanakan haknya sebagai sebuah negara yang bebas dan berdaulat. Maka, tiada negara termasuk dari Barat yang boleh menghalang Malaysia daripada berbuat demikian," katanya.

Menyuarkan sentimen yang sama, Pengerusi Pertubuhan Kebudayaan Palestin Malaysia (PCOM) Baderuddin Seyam menghargai usaha Anwar, termasuk gesaannya agar masyarakat antarabangsa mengutuk pencerobohan Israel, menghentikan sokongan terhadap pendudukan dan menamatkan jenayah perang di Gaza.

"Perdana Menteri Malaysia itu berjanji akan mengetuai inisiatif antarabangsa di peringkat serantau dan antarabangsa, terutama ketika lawatannya ke Timur Tengah, untuk menghentikan segera pencerobohan terhadap Gaza dan menolak pemindahan secara paksa.

"Beliau juga komited untuk mempercepatkan operasi koridor kemanusiaan ke Gaza dan menghantar bantuan perubatan yang diperlukan. Kami menyeru kepada rakyat Malaysia supaya menyokong tindakan Perdana Menteri ini," katanya.

Bekas Ketua Jabatan Pengajian Antarabangsa dan Strategik UM Prof Datuk Mohamad Abu Bakar menyifatkan pendirian Anwar mampu memberi dorongan kepada gerakan antarabangsa untuk mengarahkan perhatian global kepada isu Palestin, yang dilihat kuasa Barat seolah-olah meminggirkannya.

Beliau berkata pendirian Malaysia itu berisiko mengundang tindak balas, namun negara ini hanya memenuhi keperluan moral dan diplomatik untuk mengatasi krisis yang berpanjangan itu.

"Suara lantang Malaysia ialah galakan bermakna kepada pihak lain seperti ASEAN supaya mengambil pendirian sama terhadap pergolakan di Timur Tengah. Sudah tiba masanya perjuangan pro-Palestin diarusperdanakan semula dalam konteks semasa," katanya.

-- BERNAMA